

The background of the entire page is a photograph of rain falling over a green field. The rain is captured with a long exposure, creating a sense of motion and texture. The field is in the foreground, and the background is a soft-focus green landscape.

AGRIBEL

BEHEREND BPK

Kennisgeving van
Algemene Jaarvergadering
2024

AGRIBEL BEHEREND BEPERK

(Ingelyf in die Republiek van Suid-Afrika)
(Registrasienommer: 1996/017629/06)

Geagte Aandeelhouer

KENNISGEWING VAN PUBLIKASIE VAN GEÏNTEGREERDE VERSLAG, FINANSIËLE JAARSTATE EN KENNISGEWING VAN 2024 ALGEMENE JAARVERGADERING.

Vind asseblief hierby aangeheg die kennisgewing van die algemene jaarvergadering (AJV) van Agribel Beherend Beperk ("**Agribel**"), soos voorsien in die Maatskappywet Nr. 71 van 2008, soos gewysig ("**die Wet**") en die AVO wat gehou sal word op **Donderdag, 29 Augustus 2024 om 11:00** te Senwes Hoofkantoor sowel as op 'n elektroniese basis.

Ooreenkomstig artikel 31(1) van die Wet word u hiermee in kennis gestel dat die Agribel jaarverslag 2024 en volledige finansiële jaarstate op die Senwes-webtuiste beskikbaar sal wees (www.senwes.com) vanaf Woensdag 17 Julie 2024. Indien u 'n gedrukte kopie van die geïntegreerde verslag of die finansiële jaarstate wil ontvang, kan u dit by die geregistreerde kantoor van Senwes Beperk, by Charel de Klerkstraat 1, Klerksdorp, 2571, verkry of by die maatskappysekretaris van Senwes (e-pos: elmarie.joynt@senwes.co.za).

Die direksie is verantwoordelik vir hierdie kennisgewing van die AJV en hulle het hulself vergewis van die wesentlikheid, akkuraatheid en ewewigtigheid van openbaarmakings in hierdie kennisgewing. Die resultate van die AJV sal so spoedig moontlik na die vergadering aangekondig word.



Alwyn Scholtz
MAATSKAPPYSEKRETARIS
KLERKSDORP

17 Julie 2024

**SKAKEL IN OP DIE MICROSOFT TEAMS UITNODIGING WAT PER APARTE
E-POS GESTUUR SAL WORD OM DIE AJV BY TE WOON
VERWYS OOK NA DIE GIDS VIR VIRTUELE DEELNAME**

Hierdie dokument is belangrik en vereis u onmiddellike aandag

Die definisies en interpretasies op bladsy 3 van hierdie kennisgewing is, tensy die konteks 'n ander bedoeling aandui, van toepassing dwarsdeur hierdie dokument, insluitend hierdie voorblad.

Kennisgewing van 2024 Algemene Jaarvergadering

AGRIBEL BEHEREND BEPERK

(Ingelyf in die Republiek van Suid-Afrika)

(Registrasienommer 1996/017629/06)

("Agribel")

BELANGRIKE DATUMS VIR ALLE AANDEELHOUERS:	2024
REKORDDATUM VIR KENNISGEWING VAN VERGADERING	17 JULIE
REKORDDATUM VIR FINALE DIVIDEND	23 AUGUSTUS voor 8:00
REKORDDATUM VIR DIE BYWONING, DEELNAME EN STEMMING BY DIE ALGEMENE JAARVERGADERING	28 AUGUSTUS om 16:00
INDIEN VAN VOLMAGTE (AFSNYDATUM)	28 AUGUSTUS om 16:00
REKORDDATUM VIR DIE ALGEMENE JAARVERGADERING	29 AUGUSTUS om 11:00

KENNIS WORD HIERMEE GEE dat die 2024 algemene jaarvergadering van aandeelhouders van die maatskappy wat in persoon of by wyse van elektroniese deelname gehou word op Donderdag, 29 Augustus 2024 om 11:00 by die Senwes Hoofkantoor te Charel de Klerkstraat 1, Klerksdorp, 2571 sowel as elektronies om die sake hieronder aangedui te hanteer.

PERSOONLIKE BYWONING:

Aandeelhouders kan die vergadering in persoon bywoon.

Aandeelhouders kan ook voor die vergadering by wyse van 'n volmag stem.

ELEKTRONIESE BYWONING:

'n Teams-uitnodiging sal aan elke aandeelhouders gestuur word voor die AJV vir elektroniese bywoning.

Indien u die AJV wil bywoon en daaraan wil deelneem en nie die Teams-skakel ontvang het nie, kontak die maatskappysekretaris onverwyld.

VOLMAG

Indien u wil deelneem aan die AJV maar voor die vergadering vir die voorgestelde besluite wil stem, kan 'n volmag teen nie later nie as Woensdag 28 Augustus 2024 om 16:00, by die maatskappysekretaris ingedien word by Charel de Klerkstraat 1, Klerksdorp, 2571 of per e-pos by: claudi.smit@senwes.co.za.

AGENDA

1. Aanbieding van die finansiële jaarstate en verslae

Die geouditeerde finansiële jaarstate van Agribel Beherend Beperk, insluitend die verslae van die direkteure en ouditkomitee vir die jaar geëindig 30 April 2024, is saam met hierdie dokument beskikbaar. Die volledige finansiële jaarstate is op Senwes se webwerf by www.senwes.com beskikbaar.

2. Aanbieding van verslag deur die Sosiale en Etiekkomitee

Die verslag van die Sosiale en Etiekkomitee vir die jaar eindigend 30 April 2024 is beskikbaar gedurende normale kantoorure vanaf die geregistreerde kantoor van die Maatskappy, Charel de Klerkstraat 1, Klerksdorp, 2571, of op versoek per e-pos vanaf die maatskappysekretaris van Agribel Beherend Beperk by alwyn@scholtzatt.co.za.

3. Gewone besluite

Aandeelhouders word versoek om vier gewone besluite te aanvaar wat te make het met i) die aanstelling van die ouditeure, ii) aanstelling van die lede van die Ouditkomitee, iii) die bevestiging van die lede van die Sosiale en Etiekkomitee en iv) die bevestiging van die dividend.

Gewone besluite vereis die goedkeuring van meer as 50% (vyftig persent) van die stemreg uitgeoefen ten opsigte van elke besluit.

Verkorte CV's van die lede van die Ouditkomitee wat staan vir verkiesing word uiteengesit op bladsy 4 en verder van hierdie kennisgewing. Die verkorte CV's van die voorgestelde lede van die Sosiale en Etiekkomitee verskyn op bladsy 5 van hierdie kennisgewing.

4. Spesiale besluite

Aandeelhouders word versoek om vyf spesiale besluite te aanvaar wat te make het met i) Wysigings tot die Akte van Oprigting, ii) Algemene magtiging om aandele uit te reik en toe te ken, iii) Magtiging aan die Maatskappy of 'n filiaal van die Maatskappy om die aandele van die Maatskappy te verkry, iv) Magtiging tot die verlening van finansiële bystand aan 'n filiaal van die Maatskappy om die aandele van die Maatskappy te verkry, en v) Goedkeuring van die vergoeding van direkteure.

Spesiale besluite vereis die goedkeuring van 66% (ses en sestig persent) van die stemregte wat ten opsigte van elke besluit uitgeoefen word.

In ooreenstemming met artikels 59(1)(a) en (b) van die Wet, is die rekorddatum vir die bepaling van die aandeelhouders van die Maatskappy geregtig om die kennisgewing van algemene jaarvergadering te ontvang (dit is die datum waarop 'n aandeelhouer geregistreer moet wees in die Maatskappy se register van aandeelhouders om kennisgewing van die algemene jaarvergadering te ontvang), Woensdag, 17 Julie 2024.

Die laaste dag van verhandeling in Agribel-aandele en die rekorddatum vir 'n aandeelhouer om op die sekuriteitsregister van die Maatskappy geregistreer te wees om geregtig te wees om die algemene jaarvergadering by te woon, deel te neem en te stem is Woensdag, 28 Augustus 2024 voor 16:00.

BESKIKBAARHEID VAN DIE JAARVERSLAG, GEOUDITEERDE FINANSIËLE JAARSTATE EN VERSLAG VAN DIE SOSIALE EN ETIEKKOMITEE:

Afskrifte van die jaarverslag en geouditeerde finansiële jaarstate vir die jaar geëindig 30 April 2024, kan verkry word vanaf die geregistreerde kantoor van die Maatskappy, Charel de Klerkstraat 1, Klerksdorp, 2571, gedurende normale kantoorure vanaf Woensdag, 17 Julie 2024, of kan besigtig word op Senwes se webtuiste: www.senwes.com.

Afskrifte van die verslag van die Sosiale en Etiekkomitee vir die jaar geëindig 30 April 2024 kan vanaf Woensdag, 17 Julie 2024 verkry word gedurende normale kantoorure vanaf die geregistreerde kantoor van die Maatskappy, Charel de Klerkstraat 1, Klerksdorp, 2571, of op versoek per e-pos vanaf die Maatskappysekretaris van Agribel Beherend Beperk by alwyn@scholtzatt.co.za.

BELANGRIKE OMSKRYWINGS:

Aandeelhouders word in kennis gestel dat die volgende woorde in hierdie kennisgewing die volgende betekenisse het:

Aandeelhouders:	Die geregistreerde aandeelhouders of lede van die Maatskappy soos van tyd tot tyd in die aandeelhoudersregister weergegee.
Agribel:	Agribel Beherend Beperk, registrasienommer 1996/017629/06
Akte van Oprigting of AVO:	Akte van Oprigting van die Maatskappy.
Direksie of Raad:	Die direksie van die Maatskappy.
Maatskappy:	Agribel Beherend Beperk.
Rekorddatum	Die datum waarop aandeelhouders wat as sodanig in die aandeelhoudersregister geregistreer is, geregtig is om kennis van die vergadering te ontvang en/of om aan die vergadering deel te neem en om te stem vir die resolusies wat ter tafel gelê is of om 'n dividend te ontvang.
Senwes:	Senwes Beperk, registrasienommer 1997/005336/06.
Wet:	Maatskappywet, Wet 71 van 2008, soos gewysig, insluitend alle skedules en regulasies daartoe.

A. VOORLEGGING VAN DIREKSIEVERSLAG EN FINANSIËLE JAARSTATE SOOS ONDERSTEUN DEUR DIE OUDITKOMITEEVERSLAG

Om aan die vergadering voor te lê:

- die direksieverslag en geouditeerde finansiële jaarstate van die Maatskappy vir die tydperk geëindig 30 April 2024*; en
- die Ouditkomiteeverslag,

soos goedgekeur deur die Direksie.

(*n Afskrif van die volledige jaarverslag vir die vorige finansiële jaar is beskikbaar op Senwes se webtuiste of op versoek by die Maatskappysekretaris van Senwes by die Maatskappy se geregistreerde kantoor.)

B. GEWONE BESLUIE

Om die volgende 4 (vier) gewone besluite te oorweeg en, indien goedgekeur, sodanige besluite met of sonder wysiging te aanvaar:

1. Gewone besluit nr. 1: Aanstelling van ouditeur

Besluit dat:

Die aanstelling van PricewaterhouseCoopers (PwC), soos genomineer deur die Maatskappy se Ouditkomitee, as onafhanklike ouditeur van die Maatskappy goedgekeur word om hierdie posisie te beklee tot die volgende algemene jaarvergadering van die Maatskappy.

Rede en gevolg:

Die rede vir gewone besluit no. 1 is dat die maatskappy se ouditeure jaarliks ingevolge die Wet by die AJV aangestel of heraangestel moet word. Die aangewese auditvennoot is mnr Pieter Vermeulen.

2. Gewone besluit nr. 2: Aanstelling van die Ouditkomitee

Besluit dat:

1 Gewone besluit nr. 2.1

Mnr NDP (Nico) Liebenberg aangestel word as lid van die Agribel Ouditkomitee tot die Maatskappy se volgende algemene jaarvergadering.

2 Gewone besluit nr. 2.2

Mnr JDM (Danie) Minnaar aangestel word as lid van die Agribel Ouditkomitee tot die Maatskappy se volgende algemene jaarvergadering.

3 Gewone besluit nr. 2.2

Mnr JJ (Jaco) Minnaar aangestel word as lid van die Agribel Ouditkomitee tot die Maatskappy se volgende algemene jaarvergadering.

Rede en gevolg:

Die Direksie beveel aan dat die Ouditkomitee uit die volgende drie nie-uitvoerende direkteure bestaan:

2.1 NDP (Nico) Liebenberg

B.Com. (Hons) Meestersgraad in Volhoubare Landbou.

Nico boer in die Bothaville-distrik sedert einde 1991 en het 'n gediversifiseerde boerdery-eenheid tot stand gebring wat bestaan uit droëlandgraan, beeste en groente onder besproeiing. Die groente-eenheid het ontwikkel in 'n belangrike nasionale verskaffer van, onder andere, wortels en waardetoegevoegde wortelprodukte vir 'n groot voedselkleinhandelaar.

Nico is 'n direkteur van Agribel en Senwes asook 'n lid van Senwes se Nominasiekomitee en Beleggingskomitee en voorsitter van die Senwes Vergoedingskomitee.

2.2 JDM (Danie) Minnaar

B.Com.

Danie boer sedert 1988 in die Kroonstad-distrik en is vir baie jare reeds deel van die landbousektor. Hy is 'n voormalige voorsitter van die Vrystaat Landbou-unie Jongboer Komitee, was betrokke by die implementering en bevordering van graanbemarking op Safex en het gedien as trustee van die Mielietrust en direkteur van Sagis.

Danie is 'n direkteur van Agribel en direkteur en voorsitter van Senwes, voorsitter van Senwes se Nominasiekomitee en lid van die Senwes Beleggingskomitee. As voorsitter van Senwes is hy ook 'n ex officio-lid van alle ander direksiekomitees van Senwes.

2.3 JJ (Jaco) Minnaar

B.Ing. Landbou.

Jaco is sedert 2000 betrokke by verskeie georganiseerde landbou-bestuurstruktuur. Hy was lid van die uitvoerende bestuur van Vrystaat Landbou en Graan SA, waar hy as voorsitter gedien het. Hy is tans president van AgriSA. Hy is ook die ondervoorsitter van Agribel. Hy is 'n lid van Senwes se Vergoedingskomitee en die Senwes Ouditkomitee. Hy is die Voorsitter van die Senwes Risikokomitee.

3. Gewone besluit nr. 3: Aanstelling van Sosiale en Etiekkomitee

Besluit dat:

Ondergenoemde persone aangestel word as lede van die maatskappy se Sosiale en Etiekkomitee ingevolge Artikel 72 van die Wet.

Name (in alfabetiese orde)	Kwalifikasies
----------------------------	---------------

GL (Gert) Malherbe	B.Agric. Gert is 'n boer en besigheidsman wat besigheid uit die Hertzogville-gebied bedryf. Hy het as direkteur op die direksie van die Suidwes Groep gedien sedert omskakeling vanaf 'n koöperasie na 'n maatskappy.
AE (Alwyn) Scholtz	B.Com LLB. Alwyn is 'n praktiserende prokureur wat sy professionele loopbaan in 1995 begin het. Hy tree sedert September 2010 op as maatskappy-sekretaris van Agribel.
WH (Thabo) van Zyl	B.Sc Agric (Landbou-ekonomie). Thabo dien op die raad van Bothaville Meule (nou Thuso Meule) sedert 2001. Hy het verder uitgebreide boerdery- en sakebedrywighede in die Wesselsbron- en Bothaville-areas. Hy was ook instrumenteel in die stigting van Telwiedre Voere in Bothaville. Thabo is 'n direkteur van Senwes, lid van die Risikokomitee van Senwes en lid van die Senwes Vergoedingskomitee.
JJ (Hansie) Viljoen	B.Agric. Mnr Viljoen was die voorsitter van Suidwes vir baie jare en is 'n gerespekteerde besigheidsman en boer in die Leeudoringstad-gebied. Hy dien ook op die direksie van Senwes.

Rede en gevolg:

Ingevolge die bepalings van regulasie 43 van die Wet, moet die maatskappy 'n Sosiale en Etiekkomitee hê. Die direksie beveel aan dat die komitee moet bestaan uit vier lede soos hierbo uiteengesit.

4. Gewone besluit nr. 4: Bekragting van finale dividend

Besluit dat:

Die aanbeveling deur die Direksie dat 'n finale dividend van 37 sent per aandeel en 'n spesiale dividend van 37 sent per aandeel verklaar moet word ingevolge klousule 19.1 van die Akte van Oprigting, te bekragtig en goed te keur.

Rede en gevolg:

Ingevolge klousule 19.5 van die Akte van Oprigting mag die algemene jaarvergadering nie 'n groter dividend verklaar as die dividend wat deur die Direksie aanbeveel is nie.

(Dividende sal om en by 3 September 2024 aan aandeelhouders uitbetaal word wat as sulks geregistreer is op die Rekorddatum van 23 Augustus 2024).

C. SPESIALE BESLUITE

Spesiale besluite vereis die goedkeuring van 66% (ses en sestig persent) van die stemregte wat ten opsigte van elke besluit uitgeoefen word.

1. Spesiale besluit nr. 1: Wysiging van die Akte van Oprigting: Kwalifikasievereistes vir aandeelhouders:

Besluit dat:

Klousule 40 van die Akte van Oprigting gewysig word om te lees soos hieronder uiteengesit:

40 KWALIFIKASIEVEREISTES VIR AANDEELHOUDERS

40.1 *Ondanks enige van die ander bepalings van hierdie AVO mag Sekuriteite slegs oorgedra word aan 'n oordragontvanger wat op die datum van sodanige aansoek vir oordrag:*

40.1.1 *in elke opsig, in die uitsluitlike diskresie van die Direksie, of 'n subkomitee van die Direksie aan wie die Direksie die gesag gedelegeer, 'n kwalifiserende persoon is soos bepaal deur klousule 40.2 hieronder ("**kwalifiserende persoon**");* of

40.1.2 *'n direkteur is van die Maatskappy of Senwes wat Sekuriteite in die Maatskappy mag ontvang ooreenkomstig die bepalings van klousules 40.3 en 40.4; of*

40.1.3 *'n persoon, regspersoon of trust is wat nie kwalifiseer vir die oordrag van Sekuriteite in terme van klousules 40.1.1 of 40.1.2 nie en die oordrag van Sekuriteite aan sodanig persoon in die uitsluitlike diskresie van Direksie, of 'n subkomitee van die Direksie aan wie die Direksie die gesag gedelegeer, tot voordeel van die Maatskappy sal wees.*

40.2 *Vir die doeleindes van klousule 40.1 hierbo, beteken "**kwalifiserende persoon**" 'n persoon wat, op die datum van die oordrag of die datum van die betrokke skriftelike versoek soos beoog in klousule 40.1:*

40.2.1 *'n bona fide boerdery as hoofberoep en belangrikste sake-aktiwiteit beoefen; of*

40.2.2 *in die geval van 'n maatskappy, 'n beslote korporasie of 'n ander liggaam van persone:*

40.2.2.1 *die hoofbedryf die van 'n bona fide boerdery is; of*

- 40.2.2.2 *effektief direk of indirek beheer word deur 'n natuurlike persoon of persone wat voldoen aan die vereiste soos uiteengesit in klousule 40.2.1 of direk of indirek beheer word deur 'n regspersoon wat voldoen aan die vereistes soos uiteengesit in klousule 40.2.2.1 of direk of indirek beheer word deur 'n trust wat voldoen aan die vereistes soos uiteengesit in klousule 40.2.3; of*
- 40.2.3 *in die geval van 'n trust, die hoofbedryf van die trust die van 'n bona fide boerdery is of deur trustees gehou word vir die voordeel van 'n persoon of persone wat op daardie datum, in familieverband of andersins, in hoofsaak voldoen aan die vereiste soos uiteengesit in klousule 40.2.1; of*
- 40.2.4 *'n erfgenaam is van aandele in die Maatskappy vanaf 'n Aandeelhouer; of*
- 40.2.5 *'n oordragontvanger word van Sekuriteite met die oog op boedelbeplanning deur 'n Aandeelhouer, of*
- 40.2.6 *'n aandeelhouer van 'n regspersoon wat voldoen aan die vereistes van klousule 40.2.2 'n oordragontvanger word van Sekuriteite wat gehou word deur sodanige regspersoon as 'n direkte gevolg van die herstrukturering van sodanige regspersoon se boerdery, besigheid, kapitaalstruktuur of groepstruktuur, of*
- 40.2.7 *'n oordragontvanger word van sekuriteite in sy hoedanigheid as 'n begunstigde van 'n trust wat sodanige sekuriteit hou tot die voordeel van sodanige oordragontvanger; of*
- 40.2.8 *'n filiaal van die Maatskappy is.*
- 40.3 *Ondanks die bepalinge van klousule 40.2, maar onderhewig aan die vereistes van die Wet en die Beurs Reëls, is die Direksie gemagtig om, maar nie verplig nie, in omstandighede waar die Direksie bepaal dat dit in die beste strategiese belang van die Maatskappy is:*
- 40.3.1 *Sekuriteite uit te reik en toe te ken aan direkteure van die Maatskappy of direkteure van Senwes wat nie kwalifiserende persone is nie, as deel van 'n algemene uitreiking van Sekuriteite deur die Maatskappy aan sy aandeelhouders; of*
- 40.3.2 *die oordrag van Sekuriteite deur 'n bestaande aandeelhouer aan direkteure van die Maatskappy of direkteure van Senwes wat nie kwalifiserende persone is nie toe te laat,*
- op terme en voorwaardes na goëddunke van die Direksie, en in elke geval, onderhewig daaraan dat alle regte verbonde aan sodanige Sekuriteite sal vestig by sodanige persoon as prinsipaal en tot sy eie voordeel, en verder onderhewig aan die bepalinge van klousule 40.4 hieronder.*
- 40.4 *'n Persoon wat die houer van Sekuriteite word ingevolge klousule 40.3, sowel as sy regsopvolgers, sal nie by magte wees om sodanige Sekuriteite of enige regte daaraan verbonde, oor te dra alvorens hy nie eers sodanige Sekuriteite of regte aan die Maatskappy (of sy benoemde/s) aangebied het om na die Maatskappy se goëddunke, onderhewig aan die verkryging van die nodige regulatoriese en aandeelhouergoedkeuring (indien enige), aanvaar of verwerp te word nie. Indien die Maatskappy sodanige aanbod nie ooreenkomstig sy voorwaardes aanvaar nie, mag die betrokke Sekuriteite en/of regte slegs oorgedra word aan 'n kwalifiserende persoon. Die bogenoemde aanbod moet –*
- 40.4.1 *skriftelik aan die Maatskappy se maatskappysekretaris gerig word by die Maatskappy se geregistreerde adres en moet die besonderhede van die voorgestelde bepalinge en voorwaardes van die aanbod uiteensit;*

- 40.4.2 oop wees vir aanvaarding deur die Maatskappy (en/of die benoemde/s) ooreenkomstig die bepalings vir 'n tydperk van vyftien (15) sakedae vanaf ontvangs daarvan deur die maatskappysekretaris; en
- 40.4.3 bepaal dat, sou die aanbod nie aanvaar word ooreenkomstig die bepalings nie, die aanbod sal verval en die betrokke Sekuriteite dan slegs oorgedra mag word aan 'n kwalifiserende persoon op dieselfde bepalings en voorwaardes soos uiteengesit in die aanbod.
- 40.5 Alle oordragte of uitreiking van Sekuriteite moet onder alle omstandighede aanvaar word deur die oordragontvanger as prinsipaal en tot sy eie voordeel.
- 40.6 Die Direksie of 'n subkomitee van die Direksie aan wie die Direksie die gesag gedelegeer is sal die formaat van die aansoek en die inligting wat verlang word ten einde die aansoek te kan beoordeel bepaal.
- 40.7 Enige goedkeuring in terme van hierdie klousule 40 sal beperk wees tot die getal Sekuriteite waarvoor skriftelik aansoek gedoen is.
- 40.8 Die bepalings van hierdie klousule 40 sal op geen wyse 'n beperking plaas op die deelname van bestaande Aandeelhouders aan enige aanbieding vir die verdere uitreiking van Sekuriteite of deelname aan enige voordele voortspruitend uit enige verandering of herstrukturering van die kapitaal struktuur van die Maatskappy nie.

Rede en gevolg:

Die rede vir hierdie spesiale besluit is om die kwalifiserings vereistes vir aandeelhouding in die maatskappy soos uiteengesit in die Akte van Oprigting duidelik te maak en om die diskresie van die direksie van die maatskappy in sekere omstandighede te bevestig om die uitreiking of oordrag van aandele in die maatskappy aan aansoekers goed te keur.

Die Wet vereis dat aandeelhouders enige wysigings aan die Akte van Oprigting deur middel van 'n spesiale resoluusie goedkeur.

2. Spesiale besluit nr. 2: Algemene magtiging om aandele uit te reik en toe te ken

Besluit dat:

As staande en algemene magtiging ingevolge Artikel 41 van die Wet en soos beoog in klousules 6.3 en 6.4 van die Akte van Oprigting, word en is die Maatskappy se gemagtigde maar onuitgereikte aandeelkapitaal, soos op die datum van hierdie besluit, hiermee onder die beheer van die direkteure van die Maatskappy geplaas tot die volgende algemene jaarvergadering, om sodanige gewone aandele aan sodanige persoon (persone) en op sodanige bepalings en voorwaardes toe te ken en uit te reik soos wat die direkteure in hul eie uitsluitlike diskresie kan bepaal; met dien verstande dat hierdie magtiging die uitreiking van gewone aandele, sekuriteite, opsies of regte wat daaraan verbonde is aan enige direkteure, voorgeskrewe beamptes of persone verwant of tussenverwant aan die Maatskappy, of 'n direkteur of voorgeskrewe beampte van die Maatskappy, soos beoog in Artikel 41(1) van die Wet, insluit.

Rede en gevolg:

Die rede vir hierdie spesiale besluit is dat die Akte van Oprigting vereis dat aandeelhouders magtiging aan die Direksie verleen om aandele uit te reik. Die Wet vereis dat aandeelhouders magtiging verleen wanneer aandele aan direkteure en/of voorgeskrewe beamptes en/of verwante partye uitgereik gaan word.

Die magtiging word vereis om die Direksie in staat te stel om in 'n posisie te wees om uitvoering te gee aan die Maatskappy se strategieë ten opsigte van die behoud en uitbreiding van sy belang in Senwes en ander landbouverwante entiteite en om aandele aan bestaande aandeelhouders uit te reik ten einde verdere kapitaal te verkry.

Die magtiging sal ook die Direksie toelaat om aan aandeelhouers die opsie te gee om aandele in plaas van 'n kontantdividend te ontvang indien die Direksie sou besluit om 'n skripdividend aan aandeelhouers aan te bied en om sodanige aandele aan die aandeelhouers uit te reik wat die keuse uitoefen om 'n skripdividend te ontvang.

3. Spesiale besluit nr. 3: Magtiging aan die Maatskappy of 'n filiaal van die Maatskappy om die aandele van die Maatskappy te verkry

Besluit dat:

Die aandeelhouers van die Maatskappy magtig hiermee, deur middel van 'n algemene magtiging en vir 'n enkele of 'n reeks transaksies, die volgende:

- a) Die verkryging van enige van sy aandele deur die Maatskappy of enige filiaal van die Maatskappy, hetsy deur middel van 'n enkele transaksie of 'n reeks transaksies, insluitend vanaf 'n direkteur of voorgeskrewe beamppte van die Maatskappy, of 'n persoon verwant aan 'n direkteur of voorgeskrewe beamppte van die Maatskappy; en
- b) die verkryging van en/of oordrag aan die Maatskappy van enige van sy aandele wat deur enige van sy filiale ooreenkomstig (a) hierbo aangekoop is,

teen sodanige vergoeding en op sodanige voorwaardes en in die hoeveelhede wat van tyd tot tyd deur die direkteure van die Maatskappy of sy filiale bepaal word, maar onderworpe aan die bepalings van die Wet, die noteringsvereistes van 'n effektebeurs waarop die Maatskappy se aandele genoteer is (indien van toepassing) en onderhewig aan sodanige ander voorwaardes as wat deur enige ander owerheid verlang mag word, met dien verstande dat:

- i. Die magtiging slegs geldig sal wees tot en met die datum van die Maatskappy se volgende algemene jaarvergadering;
- ii. Die algemene magtiging om aandele in die Maatskappy ooreenkomstig (a) hierbo in enige 1 (een) finansiële jaar te koop, sal beperk word tot 'n maksimum van 5% (vyf persent) van die Maatskappy se uitgereikte aandeelkapitaal van daardie klas op die datum waarop die magtiging toegestaan is;
- iii. Die direksie van die Maatskappy besluit het (a) om die verkryging van aandele in die Maatskappy te magtig, (b) dat die Maatskappy die solvensie- en likiditeitstoets soos beoog in die Wet geslaag het, en (c) dat geen wesenlike verandering plaasgevind het in die finansiële posisie van die Maatskappy en sy filiale ("die groep") sedert die toepassing van die solvensie- en likiditeitstoets nie;
- iv. Die Maatskappy of sy filiale mag nie enige aandele gedurende 'n geslote tydperk vir die verhandeling van aandele bekom nie, tensy 'n terugkoopprogram ingestel is waarin die datums en aantal aandele wat gedurende die betrokke tydperk verhandel mag word, bepaal is en waarvan omvattende besonderhede van die program deur middel van 'n aankondiging aan die algemene publiek en aandeelhouers bekendgemaak is.

Rede en gevolg:

Die rede vir en gevolg van spesiale besluit nr.3 is om algemene magtiging te verleen ingevolge die Akte van Oprigting en die Wet aan die Maatskappy of enige van die filiale van die Maatskappy, om hulle in staat te stel om aandele uitgereik deur die Maatskappy te verkry, insluitend die opeenvolgende verkryging of oordrag aan die Maatskappy van aandele verkry deur sy filiale op hierdie wyse asook aandele verkry vanaf lede van die direksie of persone verwant aan die lede van die direksie.

4. Spesiale besluit no. 4: Magtiging tot die verlening van finansiële bystand aan 'n filiaal van die Maatskappy om die aandele van die Maatskappy te verkry

Besluit dat:

As 'n algemene goedkeuring in terme van en onderhewig aan Artikel 44 van die Wet, soos gewysig, mag die direkteure die maatskappy magtig om finansiële bystand (soos gedefinieer in die Wet), te verleen deur 'n lening, waarborg, die verskaffing van sekuriteit of andersins aan enige verwante maatskappy van die Maatskappy vir doeleindes van, of in verband met, die inskrywing vir enige opsie, of enige sekuriteite, wat deur die Maatskappy of 'n onderlinge verwante maatskappy uitgereik is of gaan word, of vir die aankoop van enige sekuriteite van die Maatskappy of 'n verwante of onderling verwante maatskappy, wat spesifiek insluit dat die Direksie sodanige reëlins namens die Maatskappy mag tref wat volgens hulle nodig is vir sodanige finansiering, bystand of subsidiëring van enige van die Maatskappy se filiale en/of geassosieerdes en/of entiteite waarin die Maatskappy 'n belang het, en vir die waarborg van sy kontrakte, verpligtinge of laste, op welke wyse ook al vir sodanige doel, vir 'n periode van 24 maande vanaf die datum van hierdie besluit.

Rede en gevolg:

Die rede vir hierdie spesiale besluit is dat, alhoewel klousule 15 van die Akte van Oprigting finansiële bystand deur die Maatskappy magtig aan enige persoon met die doel om, of in verband met, die inskrywing van enige opsie of enige Sekuriteite wat uitgereik is of uitgereik moet word deur die Maatskappy of 'n verwante of onderling verwante maatskappy, of vir die aankoop van sodanige Sekuriteite van die Maatskappy, Artikel 44 van die Wet vereis dat sodanige finansiële bystand slegs verleen mag word indien die aandeelhouers, by wyse van 'n spesiale besluit geneem gedurende die vorige twee jaar, sodanige finansiële bystand goedgekeur het. In praktyk behels dit dat Agribel nie enige nuwe befondsing aan sy filiale of geassosieerde maatskappye mag verleen vir die verkryging van Agribel aandele nie, tensy dit deur die aandeelhouers goedgekeur word.

Die effek van hierdie besluit is dat algemene magtiging aan die Direksie verleen word om befondsing te verskaf aan sy filiale om aandele in die Maatskappy te bekom. Die magtiging word verleen vir 'n periode van twee jaar vanaf die datum van die spesiale besluit.

Die aandeelhouers het tydens die 2023 algemene jaarvergadering 'n algemene goedkeuring verleen vir die verskaffing van finansiële bystand deur die Maatskappy aan onderlinge verwante maatskappye. Vir Agribel om finansiële bystand aan onderlinge verwante maatskappye te verleen om aandele in Agribel te bekom, verg egter 'n verdere spesifieke magtiging. Die magtiging verleen in terme van hierdie resolusie sal die strukturering en implementering van 'n aandeleterugkoopprogram deur die Maatskappy in die toekoms vergemaklik.

5. Spesiale besluit nr. 5: Goedkeuring van die vergoeding van nie-uitvoerende direkteure

Besluit dat:

Ingevolge Artikel 66(9) van die Wet moet betaling van vergoeding vir dienste deur nie-uitvoerende direkteure van die Maatskappy goedgekeur word vir die tydperk 1 September 2024 tot 31 Augustus 2025 soos uiteengesit in die onderstaande tabel:

KATEGORIE	Voorgestelde Vergoeding 2024 - 2025
Raadslede	
Voorsitter (<i>per jaar</i>)	R472 045
Ondervoorsitter (<i>per jaar</i>)	R277 568
Direkteure (<i>per jaar</i>)	R192 756
Spesiale projekte (<i>per dag</i>)	R3 578

KATEGORIE	Voorgestelde Vergoeding 2024 - 2025
Komitee voorsitters (per jaar):	
Ouditkomitee	R28 396
Sosiale & Etiekkomitee	R14 211
Lede van Komitees (per jaar):	
Lede van Ouditkomitee	R14 211
Lede van Sosiale & Etiekkomitee	R7 105
Reiskoste: Heersende AA-tariewe.	
Reis- en verblyfkoste: Werklike uitgawes.	

Bogenoemde bedrae sluit nie BTW in nie en BTW sal bygevoeg word indien van toepassing.

Rede en gevolg:

In ooreenstemming met die bepalings van klousule 32 van die AVO, is 'n nie-uitvoerende direkteur geregtig op die vergoeding soos bepaal deur die maatskappy van tyd tot tyd by 'n algemene vergadering. Artikel 66 (9) van die Wet vereis dat vergoeding goedgekeur word deur middel van 'n spesiale besluit deur aandeelhouders en die vergoeding word dus vir oorweging ter tafel gelê.

Die effek van spesiale besluit nr. 4, indien aanvaar, is dat die maatskappy sy nie-uitvoerende direkteure sal kan betaal vir die dienste wat hulle aan die maatskappy lewer as direkteure tot die volgende algemene jaarvergadering van die maatskappy.

Besonderhede van die vergoeding betaal vir die jaar geëindig 30 April 2024 is beskikbaar in die geïntegreerde verslag (verwys na www.senwes.com).

D VERKIESING VAN DIREKTEURE

Ingevolge die Akte van Oprigting moet mnr JDM (Danie) Minnaar ooreenkomstig die rotasiebeleid by hierdie vergadering uittree. Mnr JDM (Danie) Minnaar het aangedui dat hy beskikbaar is vir herverkiesing.

Ingevolge klousule 29.6 van die Akte van Oprigting is nominasies vir die aanstelling van direkteure op 19 Maart 2024 van die lede aangevra. Slegs een kandidaat is behoorlik deur die lede genomineer vir die vakature, naamlik mnr JDM (Danie) Minnaar.

Die genomineerde is derhalwe aangestel as direkteur sonder dat dit nodig was om nog 'n aandeelhoudersvergadering te hou om 'n direkteur aan te stel om die vakature te vul.

Die verkorte curriculum vitae van mnr. Minnaar is soos volg:

JDM (Danie) Minnaar

Volle Name en Van:

Jan Daniël Marquard Minnaar

Diensjare:

Direkteur sedert September 1999

Kwalifikasie:

B.Com.

Beroep:

Danie boer sedert 1988 in die Kroonstad-distrik en is vir baie jare reeds deel van die landbousektor. Hy is 'n voormalige voorsitter van die Vrystaat Landbou-unie Jongboer Komitee en het gedien as trustee van die Mielietrust en direkteur van Sagis. Danie is 'n direkteur van Agribel en direkteur en voorsitter van Senwes, voorsitter van Senwes se Nominasiekomitee en lid van die Beleggingskomitee. Danie is sedert 1999 'n nie-uitvoerende direkteur van Senwes en Senwes voorsitter sedert 25 Junie 2013.

KENNISGEWING INGEVOLGE ARTIKEL 45 VAN DIE WET

Aandeelhouders word hiermee in kennis gestel dat die direksie ingevolge die bepalings van Artikel 45 van die Wet en in ooreenstemming met 'n spesiale besluit wat aandeelhouders op die algemene jaarvergadering van 2023 aanvaar het, ingevolge 'n besluit van die Raad, finansiële bystand verleen het aan verwante of interverwante maatskappye van die Maatskappy, soos voorsien in artikel 45(5) van die Wet.

Ingevolge artikel 45(5) van die Wet word aandeelhouders verder in kennis gestel dat die Raad tevrede is, onderhewig aan die bepalings van die raadsbesluit en daaropvolgende magtiging, dat:

- onmiddellik na die verskaffing van bogenoemde finansiële bystand, die Maatskappy steeds sal voldoen aan die solvensie- en likiditeitstoets soos bedoel in artikel 4 van die Wet; en
- die bepalings waaronder bogenoemde finansiële bystand voorgestel word, billik en redelik is teenoor die Maatskappy en al die toepaslike vereistes en beperkings ten opsigte van finansiële bystand soos uiteengesit in die AVO, bevredig is ooreenkomstig artikel 45(4) van die Wet.

Die maatskappy het die volgende bedrae as lenings of finansiële steun aan sy filiaalmaatskappye en verwante partye verleen vanaf 1 Mei 2023 tot 30 April 2024:

Aard van Bystand	Bedrag
Lening aan Senwes	R9 991 701,38
Lening aan Agribel Capital (Edms) Bpk	R24 342 844,84

Deur hierdie kennisgewing te gee, is die maatskappy van mening dat dit aan die kennisgewingvereistes van die Wet voldoen het. Die maatskappy wil graag beklemtoon dat die toestaan van finansiële bystand tussen verwante en interverwante maatskappye 'n standaardpraktyk is wat oor baie jare konsekwent deur die Senwes Groep toegepas is.

STEMMING BY DIE ALGEMENE JAARVERGADERING

- Die AJV sal geheel en al deur elektroniese kommunikasie (insluitend stemming by die AJV) soos beoog in artikel 63(2)(a) van die Maatskappywet gedoen word. Die prosedure vir deelname deur elektroniese kommunikasie word hieronder uiteengesit.
- As deel van die registrasieproses sal jy versoek word om bewys van identifikasie (d.w.s. identiteitsdokument, rybewys of paspoort) en magtiging om dit te doen (waar jy in 'n verteenwoordigende hoedanigheid optree) op te laai, asook om besonderhede te verskaf, soos jou naam, van, e-posadres, kontaknommer en aantal Agribel-aandele wat gehou word.
- Die elektroniese kommunikasie wat gebruik word, sal alle persone wat aan die AJV deelneem in staat stel om gelyktydig met mekaar te kommunikeer sonder 'n tussenganger en om effektief aan die AJV deel te neem. Stemming sal moontlik wees via elektroniese kommunikasie. Sodra die AJV begin het, sal deelnemers via die stemplatform kan stem.
- Hoewel stemmery tydens die AJV via die elektroniese platform toegelaat sal word, word aandeelhouders aangemoedig om stemme per gevolmagtigde voor die AJV in te dien.
- Aandeelhouders word verder aangemoedig om enige vrae per e-pos aan elmarie.joynt@senwes.co.za op Woensdag, 28 Augustus 2024, per e-pos aan voor te lê. Daar sal ook tydens die AJV 'n vraagfasiliteit op die virtuele platform beskikbaar wees.
- Aandeelhouders sal aanspreeklik wees vir die koste wat hulle aangaan om die AJV by te woon. Aandeelhouders sal ook alleen verantwoordelik wees om te verseker dat hulle ononderbroke toegang tot die AJV het. Nóg Agribel, nóg sy diensverskaffers sal aanspreeklik gehou word in die geval van verlies aan netwerkverbinding; netwerkfout as gevolg van onvoldoende lugtyd/ internetverbinding / kragonderbrekings of iets soortgelyks wat aandeelhouders sal verhoed om die AJV by te woon, deel te neem en / of te stem.
- Agribel kan nie waarborg dat daar nie 'n onderbreking in elektroniese kommunikasie sal wees wat buite die beheer van die maatskappy is nie.

In opdrag van die direksie van die maatskappy.



AE Scholtz
MAATSKAPPYSEKRETARIS

Tel nr. 076 212 1776

Klerksdorp
17 Julie 2024

OPSOMMING VAN REGTE VERVAT IN ARTIKEL 58 VAN DIE WET

Nieteenstaande die inhoud van die notas hierin vervat, moet aandeelhouders kennis neem van die bepalings van artikel 58 van die Wet. Ingevolge artikel 58 van die Wet:

- kan 'n aandeelhouer van 'n maatskappy op enige tydstip en ooreenkomstig die bepalings van artikel 58 van die Wet, enige individu (insluitende 'n individu wat nie 'n aandeelhouer is nie) as gevolmagtigde aanstel om namens die aandeelhouer deel te neem aan, en te praat en te stem by, 'n aandeelhoudersvergadering;
- kan 'n gevolmagtigde sy of haar gesag om namens die aandeelhouer op te tree aan 'n ander persoon delegeer, behoudens enige beperking wat uiteengesit word in die instrument wat die gevolmagtigde aanstel (sien nota 10 tot die Volmagvorm);
- ongeag die formaat van die instrument wat gebruik word om 'n gevolmagtigde aan te stel, word die aanstelling van 'n gevolmagtigde op enige tydstip opgeskort en in die mate wat die tersaaklike aandeelhouer kies om direk en persoonlik in die uitoefening van enige sodanige regte as aandeelhouer op te tree (sien nota 4 tot die Volmagvorm);
- is die aanstelling van 'n gevolmagtigde deur 'n aandeelhouer herroepbaar, tensy die vorm van die instrument wat gebruik is om sodanige gevolmagtigde aan te stel anders aandui;
- indien die aanstelling herroepbaar is, kan 'n aandeelhouer die aanstelling van 'n gevolmagtigde herroep deur (i) dit skriftelik te kanselleer, of 'n later strydige nominasie van 'n gevolmagtigde te maak; en (ii) 'n kopie van die herroepings instrument aan die gevolmagtigde en aan die maatskappy te lewer;
- 'n gevolmagtigde wat deur 'n aandeelhouer aangestel is, is daarop geregtig om enige stemreg van die aandeelhouer uit te oefen, of buite stemming te bly, sonder opdrag, buiten in die mate wat die tersaaklike maatskappy se Akte van Oprigting, of die instrument wat die gevolmagtigde aanstel, anders bepaal (sien nota 2 tot die Volmagvorm);
- indien die instrument waarin 'n gevolmagtigde of gevolmagtigdes aangestel word, deur 'n aandeelhouer aan 'n maatskappy gelewer is, en so lank as wat daardie aanstelling van krag bly, moet enige kennisgewing wat ingevolge hierdie Wet of sodanige maatskappy se Akte van Oprigting deur die maatskappy aan die aandeelhouer gelewer moet word, deur die maatskappy gelewer word aan –
 - die tersaaklike aandeelhouer; of
 - die gevolmagtigde of gevolmagtigdes, indien die aandeelhouer: (i) die maatskappy skriftelik opdrag gegee het om dit te doen; en (ii) enige redelike geld betaal het wat deur die maatskappy gehef word om dit te doen; en
- indien 'n maatskappy 'n uitnodiging aan aandeelhouders rig om een of meer persone aan te stel wat deur die maatskappy as 'n gevolmagtigde genomineer is, of 'n vorm van instrument verskaf:
 - moet die uitnodiging na die vergadering waarop die volmag uitgeoefen kan word, aan elke aandeelhouer gestuur word wat geregtig is op kennisgewing van die vergadering;
 - moet die uitnodiging of vorm van instrument wat deur die maatskappy verskaf word:
 - 'n redelike prominente opsomming van die regte wat deur artikel 58 van die Wet bepaal word, bevat;
 - voldoende oop ruimte bevat onmiddellik voor die naam of name van enige persoon/persone wat daarin genoem word sodat 'n aandeelhouer die naam, en indien hy/sy wil, 'n alternatiewe naam van 'n gevolmagtigde kan neerskryf wat deur die aandeelhouer gekies word; en
 - voldoende ruimte vir die aandeelhouer laat om aan te dui of die aangestelde gevolmagtigde ten gunste van of teen enige besluit(e) moet stem wat aan die vergadering gestel gaan word, of buite stemming moet bly;
 - moet die maatskappy nie vereis dat die aanstelling van 'n gevolmagtigde onherroeplik gemaak moet word nie; en
 - die aanstelling van 'n gevolmagtigde slegs geldig bly tot aan die einde van die vergadering waarop dit beoog was om gebruik te word.

AGRIBEL BEHEREND BEPERK

(ISIN Nommer: ZAEZ00000026)
(Ingelyf in die Republiek van Suid-Afrika)
(Registrasienommer 1996/017629/06)

VOLMAGVORM: 2024 ALGEMENE JAARVERGADERING

Tensy dit anders gestipuleer word of duidelik blyk uit die samehang, sal alle begrippe met hoofletters in die volmagvorm die betekenisse hê wat daaraan toegeskryf is in die kennisgewing waaraan hierdie volmagvorm aangeheg is.

Vir gebruik deur aandeelhouders by die algemene jaarvergadering. Lees asseblief die opsomming en notas agterop hierdie volmagvorm.

Ek/Ons (volle naam in drukskrif) _____

van (adres) _____

Identiteit-/registrasie nr. _____ Aandeelhouders / Senwes klant nr.: _____

Sel nr. _____ E-pos adres: _____

- _____, of indien nie hy nie,
- _____, of indien nie hy nie,
- die voorsitter van die algemene jaarvergadering,

as my/ons gevolmagtigde om vir my/ons op te tree by die algemene jaarvergadering ten einde die besluite wat daar, en by enige verdagting of uitstel daarvan, voorgestel word te oorweeg en, sou dit geskik geag word, aan te neem en om die stemme uit te bring ten opsigte van al die aandele wat in my/ons naam/name geregistreer is, soos volg (dui met 'n "X" aan wat van toepassing is):

		TEN GUNSTE VAN BESLUIT	TEEN BESLUIT	BLY BUITE STEMMING
Gewone besluite				
1	Gewone besluit nr. 1: Aanstelling van die Ouditeur			
2	Gewone besluit nr. 2: Aanstelling van die Ouditkomitee-lede:			
2.1	Gewone besluit nr. 2.1: Mnr NDP Liebenberg			
2.2	Gewone besluit nr. 2.2: Mnr JDM Minnaar			
2.3	Gewone besluit nr. 2.3: Mnr JJ Minnaar			
3	Gewone besluit nr. 3: Aanstelling van die Sosiale en Etiekkomitee-lede:			
3.1	Gewone besluit nr. 3.1: Mnr GL Malherbe			
3.2	Gewone besluit nr. 3.2: Mnr AE Scholtz			
3.3	Gewone besluit nr. 3.3: Mnr WH van Zyl			
3.4	Gewone besluit nr. 3.4: Mnr JJ Viljoen			
4	Gewone besluit nr. 4: Bekragtiging van finale dividend			
Spesiale besluite				
1	Spesiale besluit nr. 1: Wysiging van die Akte van Oprigting			
2	Spesiale besluit nr. 2: Algemene magtiging om aandele uit te reik en toe te ken			
3	Spesiale besluit nr. 3: Magtiging aan die Maatskappy of 'n filiaal van die Maatskappy om die aandele van die Maatskappy te verkry			
4	Spesiale besluit nr. 4: Finansiële bystand: Verwante Maatskappye			
5	Spesiale besluit nr. 5: Direkteursvergoeding			

(Dui opdrag aan gevolmagtigde aan by wyse van 'n kruisie in die blokkie wat hierbo voorsien is.)

Geteken te _____ op _____ 2024.

Handtekening(e) (sien nota 6) _____

Name van ondertekenaar(s) (volle name in drukskrif) _____

Faks asb. na: **086 680 3124** of
E-pos aan: **claudi.smit@senwes.co.za**

Bygestaan deur (sien nota 8) (volle naam en hoedanigheid) _____

NOTAS TOT DIE VOLMAGVORM

1. 'n Lid is geregtig om die name van twee alternatiewe gevolmagtigdes van die lid se keuse in die toepaslike ruimte op die keersy in te vul, met of sonder skraping van "die voorsitter van die vergadering", maar enige sodanige skraping moet deur die lid geparafeer word. Die persoon wie se naam eerste op die volmagvorm staan, en wat by die algemene vergadering teenwoordig is, sal geregtig wees om as gevolmagtigde op te tree tot die uitsluiting van diegene waarvan die name daarop volg. Indien geen gevolmagtigde se naam in die blanko ruimtes ingevul word nie, sal geag word dat die voorsitter van die vergadering gevolmagtig is om namens die lid op te tree.
2. Na die mate waarin geen stemopdrag deur die lid in die toepaslike ruimte(s) aangedui word nie, sal geag word dat die gevolmagtigde, wat dus ook die voorsitter kan wees, na eie goeddunke mag optree.
3. Enige wysiging of toevoeging tot die volmagvorm moet deur die ondertekenaar(s) geparafeer word.
4. Dokumentêre bewys van die magtiging van 'n persoon wat die volmagvorm in verteenwoordigende hoedanigheid teken, kan vereis word. Aanvaarbare vorms van identifikasie sluit in wettige identiteitsdokumente, bestuurslisensies of paspoorte.
5. 'n Minderjarige moet deur sy/haar ouer of voog bygestaan word, tensy die betrokke dokumentêre bewyse vir sy/haar bevoegdheid aan die maatskappy voorgelê is of word.
6. Boedels wat op die stemlys voorkom, mag slegs deur middel van die betrokke eksekuteur/likwidateur/ kurator stem by voorlegging van bewys van aanstelling deur die Meester van die Hoër Hof. Indien deur middel van 'n volmag gestem word, moet bogenoemde bewys die volmag vergesel.
7. In die geval van gesamentlike houer(s) van aandele:
 - 7.1 mag enige een van die gesamentlike houer(s) die volmagvorm teken; en
 - 7.2 sal die stem van die senior gesamentlike houer (vir hierdie doeleindes sal senioriteit bepaal word deur die volgorde waarin die name van die gesamentlike houer(s) in die maatskappy se aandeelregister aangeteken is) wat 'n stem aanbied (hetsy in persoon of by wyse van volmag) aanvaar word tot die uitsluiting van die ander gesamentlike houer(s).
8. Die voltooiing en indiening van hierdie volmagvorm verhoed nie die betrokke lid om die algemene jaarvergadering by te woon, daarop te praat en persoonlik daarop te stem nie tot die uitsluiting van enige gevolmagtigde hieringevolge aangestel, indien sodanige lid aldus verkies is.
9. Volmagvorme moet aan die maatskappysekretaris van Senwes, mev EM Joynt, by die geregistreerde kantoor van die maatskappy te Charel de Klerkstraat 1, Klerksdorp, 2571 (Posbus 31, Klerksdorp, 2570), besorg word om haar te bereik nie later nie as 16:00 op Woensdag, 28 Augustus 2024.

Volmagvorme kan ook aan die maatskappysekretaris van Senwes per faks of e-pos gestuur word na faks nr. 086 680 3124 of e-pos: claudi.smit@senwes.co.za of ingedien word via die Internet voor of op bogenoemde datum.